
ВИЛОЯТ ҲОКИМИ БЕШАРИҚ ТУМАНИДА БЎЛДИ: ХОТИН-ҚИЗЛАР БАНДЛИГИНИ ТАЪМИНЛАШ УЧУН ХОНАДОНБАЙ, ФУҚАРОБАЙ ИШЛАШ ЙЎЛГА ҚЎЙИЛАДИ

Вилоят ҳокими Хайрулло Бозоров Бешариқ туманида “Аёллар дафтари”га киритилган хотин-қизлар билан маҳаллабай ишлаш тизимини йўлга қўйиш ва келгусида амалга ошириладиган вазифаларга бағишланган тадбирда иштирок этди.

Вилоят ҳокими дастлаб вилоят касаба уюшмалари ташкилотлари бирлашмаси ташаббуси билан Бешариқ туманида “Аёллар дафтари”га киритилган хотин-қизлар учун яратилган, 200 нафар аёлларга янги иш ўринлари яратган “Sherwood Design” корхонасига ташриф буюрди. Янги тикувчилик цехи очилиш маросимида сўз олган Хайрулло Бозоров барча мутасаддилар, маҳаллабай ишлаш тизимига бириктирилган иқтисодий комплекс вакиллариининг асосий мақсади фақат янги иш ўринлари яратишга қаратилиши зарурлигини таъкидлади.

“Ҳар уч дафтарга киритилган фуқароларнинг бандлигини таъминласак, қамбағалликдан қутуламиз. Бунинг учун маҳаллабай ишлаш тизимига бириктирилган вакиллар ҳамкорликда хонадонма-хонадон, фуқаробай ишлашимиз керак”, деди вилоят раҳбари.

Тадбир иштирокчилари Адиробод массивида, яъни Ворух-Дашт маҳалла фуқаролар йиғинида ташкил этилган, 100 нафар аёллар бандлигини таъминлаган “Адиробод Фунчалари” кооперациясининг очилиш маросимида қатнашдилар.

Вилоят ҳокими бу ерда амалга оширилган лойиҳа билан танишар экан, уни янада кенгайтириш, томчилатиб суғориш учун тик артезан қудуқлари қазиш ҳақида топшириқ берди.

Хайрулло Бозоров шунингдек, Хитой инвестицияси билан барпо этилган “Ясин қурилиш моллари” цемент заводида ҳам бўлиб, корхонанинг иккинчи босқичи қурилиш жараёнлари билан танишди. Умумий қиймати 200 миллион доллар бўлган бу лойиҳанинг ҳозирги ҳолатида бир кунда 2 минг 500 тонна сифатли цемент ишлаб чиқарилмоқда. 2021 йил якунида заводнинг иккинчи навбати ишга туширилгач ишлаб чиқариш ҳажми йиллик 2 миллион тоннага етади ҳамда 700 нафар маҳаллий аҳоли доимий иш жойига эга бўлади.